

英國世界地圖集

THE NEW EDITION OF THE
IMPERIAL ATLAS OF THE WORLD
BY
J. J. JOYCE, F.R.S., F.R.G.S., F.R.I.

英國世界地圖集

陝西府縣志輯 ②⑧

本書凡圖三十三平一由同官縣知事出題

古公《×ろ丁ろ》

同官縣志

糸錦題

全書總目

卷首 序

纂修姓名

凡例

志目

卷一至卷三十（見志目）

卷末 跋

本書民國三十三年一月由同官縣政府出版

同官縣志序

同官、禹貢雍州之域也。秦隸內史，漢置葭陽，晉設頻陽，迨其播遷，拓拔氏崛起北荒，乃因銅官川建銅官縣焉。宇文周因之，去銅字爲同，沿革迄今，幾兩千年矣。邐邐之間，隸屬屢更，縣治累遷。今其城依虎踞，銅漆爲池，形勢險固；縱世事萬變，而山川終古。且以地褊而當南北要道，故歷經興亡，廢壘獨多。往昔爭戰之遺跡，文物之廢墟，尤班班可考也。臨其地者，寧無發思古之幽情者乎？抗戰軍興，三秦衝要。同官肩負西京，指臂郃洛，遙制敵寇，尤爲國防之重鎮。年來經濟建設，同官礦藏豐富，煤產月二萬餘噸，實冠於西北，軍需民用，咸利賴之。其於抗建，貢獻殊大！惟夷攷其歷代之變遷。文物之盛衰，與夫山川道里之詳，風化民俗之情，則邑乘失修，載籍闕如，未嘗不慨然興嘆一方文獻之缺也！夫縣志者，蓋所以稽事載典，彰往昭來也。若瞻然而弗修，其守土有司，將何以攷俗準治哉？文獻之徵，豈可闕乎！第三行政區，余專員正東，有志於斯文，創議重修區屬各縣舊志，爲時僅一載，而初稿草成，其志其事，可謂壯矣。旣修同官縣志成，請序於余。余覽其書，燦然大備，而體例新穎，爲舊志所無。至若紀載之實，攷訂之精，印訂之美，猶其餘事焉。誠爲近代

方志之新構，豈僅備一方之文獻而已哉。因是爲序。

中華民國三十三年夏五月三十日錢塘市南祝紹周

同官縣志序

同官地近陝北，邑小而民貧。觀其人文，雖無關中各邑之盛，而以山川險峻，地方瘠苦，人無外嗜，故其風俗淳樸，有足稱者。舊有縣志，紀載缺略。百年以來，未能續修，文獻散佚，識者憾焉。余君正東爲陝西第三區督察專員，慨然念地方政治之變遷，文物之隆替，無所紀述，於是倡修縣志，而同官適爲三區所轄之縣，遂與洛川等志同時修纂。搜羅採集踰一年之久，而新志觀成。體例雖云從新，紀載務求翔實。後之人欲於是邑考風問俗，讀此志，可以瞭然而無遺矣。其裨益於政教，豈淺眇也哉？牟平彭昭賢

同官縣志序

同官前志爲清乾隆三十年知縣袁文觀先生所手訂，距今一百七十九年矣。歷經兵燹，孤本僅存。雖有民國二十一年翻印本，近亦不可多得。且於地方事蹟，一無續補，徵攷難悉，廢墜堪虞。三十一年春，余倡修區屬洛川、中部、宜君、宜川、同官、黃龍各志，同之官民亦以爲當務。和紳文瑄李紳楊三尤洞諳掌故，深悉民情，殫力竭神，草成初稿。三十三年春初，洛川志成書，余復聘黎劭西先生代爲審核，譌者正之，疑者辯之；和李兩紳，復親爲讎校；田縣長在養對此贊翊甚力，與王紳少文、姬紳命新等妥籌剗勵之費；余則僅從旁策劃調度以期其成。茲幸此志能於中宜各志之先，刊成出版，勉酬夙願；嗣是生斯土、與官斯土者，尙能踵事增華，勿更遲至百數十年以後，則爲幸甚矣。

陝西省第三區行政督察專員兼保安司令湖北大冶余正東謹譔

中華民國三十三年四月

同官縣志序

周官誦訓，邦國之記籍攸傳；地志山經，方輿之勝覽斯備。前事不忘，後事之則。典章文物，關繫盛衰；文獻不徵，仲尼斯歎。故一國有一國之史，而一縣有一縣之志。溯源地志，創始漢書；歷代踵因，風物斯顯。况縣志爲國史之淵藪，而國史乃縣志之集成，所以紀文獻而昭來茲，備沿革而知損益，意義曷乎尙矣。同官縣志，創始於萬曆戊午，其後增修，已歷三次。余重宰茲土之上年，本區專員余公簿書執掌之餘，留心典籍，鑒於各縣方志或年久失修，或散佚不傳，影響政治經濟文化之建設、忠孝節烈民風之垂示綦深且鉅，慨然下令，整理重修，並聘黎劭西先生董總纂之責。本縣遵令組織委員會，延聘士紳王蘊章、寇湘陽、姬命新、和文瑄、李楊山、楊春榮等爲採訪員，由和文瑄李楊山楊春榮等秉椽筆，主初稿，廣採資料，窮搜冥索，較之原志，大有增益，分門別類，序列井然。其中尤以地質、地形、水文、鑛業、農業、財政等篇紀載詳盡，前志所無。閱期年而脫稿，核定付梓。余於重修斯志因有感焉：社會演進，靡有止境，後勝於今，猶今之勝於昔也。與斯役者，變通成規，昕夕研覈，以適時代之需要，權衡在心，斟酌至當。余兩宰茲土，先後五易陽秋，正值抗建方殷，

而環境特殊，財政支絀，爾後建設，萬端待理，所望賢明紳碩，參鏡斯志，共圖進步，並留心地方文獻，以時蒐集，俾易踵事增華，則斯志之新修，其意義乃足以繼往而開來，承先而啓後矣。民國三十三年三月渭南田在養序

同官縣志序

陝之同官，壤地褊小，清乾隆時，巡撫畢沅議省併，吳人顧森適流寓於此，移書力爭，乃已，邑人以爲「殺稂干城」焉。其隸屬亦無定，清代原屬耀州，自雍正時耀改散州，始屬西安府，民國初隸關中道，嗣隸第七行政督察區，三十年改隸第三區，迄今年本志印未竣時，復議改隸第二區：二區專署新置於耀，則猶清之屬耀州矣；而向之隸三區，則猶晉唐之屬北地宜君也。然其鑛藏特富，現月產煤約二萬噸，倘三倍其產量，尙可開採二百年；考古家每斃稱耀州宋瓷，實出同官，耀固無陶土，銷場所在耳；孟姜女之謳歌歷三千年，其生沒遺蹟，傳皆在此。是其邑雖小，而頗具全國性與歷史性，異乎洛川之但爲區治者矣。余核印洛川志甫竣，卽從事同官，邑志雖成於乾隆，而民國有續稿二十四卷，李君楊山之所撰也；自三區余專員正東倡率修志，復依所頒類目修訂補充，精繕得二十冊，則前年李君及和君文珪、楊君華亭共爲之者也。三區專署所頒類目，悉採余所艸之「方志今議」，原稿條分件繫，鉅細不遺，余核訂時，轉多省變，蓋視其材料之翔實與否，不容爲體例所拘牽也。計得三十篇，具詳例目。

方洛川志之成，余曾爲長序，謂比事屬辭，區區易爲，吃緊工作，仍在材料之蒐集。蓋今人之於方志，猶多誤解，時代已殊，陳見未去，第一過重文辭，不知志乘敘述，但貴簡明有條理，了無支蔓複雜虛套之辭，果能是，用白話文且更佳也。稍進則知重編次體裁，實則頭腦清楚而常識充足者，秉筆發凡，於體裁亦無何等問題也。大問題只在材料之不實不盡而已！余所舉材料來源三宗：一曰實地調查，二曰檔案整理，三曰羣書採錄，皆非易事。調查必依科學方法，至少亦須據方志今議中所擬二十餘種表目，一度普查，自核洛志，知此事非對縣政人員先施訓練不可，則省縣政府之事矣，於是圖難於易，易「實地調查」爲「方桌訪問」；茲核同志，此層最爲順手，和李二君，深悉邑故，相處一室，時經三月，一有疑問，隨舉隨答；且李君於二十四年續編時，跋涉山川，探查登錄，法卽未備，功已可欽。至其次之「檔案整理」，則非先有統一之類碼與平昔之責成不可，又中央政府之事矣，於是易爲「報告抄送」；復次之「羣書採錄」，則每邑爲之，甚不經濟，宜有統籌全國之工作機構，又中央學術機關之事矣，於是易爲「舊志剪貼」：茲核同志，前者原稿已就地徵集抄入，偶有未備，或誤於手民，自所難免；後者又以印校倉促，乾隆舊志固已囊括其中，而雍正之

省通志，民國兩采

伯魯
卿奎

之續通志稿，以及縣所舊隸之耀州、西安兩志，乃竟未遑參稽，頗爲

遺憾。

惟原稿亦曾略
參續通志稿。

總而言之，新修方志，得如同官者，酌古準今，披文懷質，縱理想未符，

而風聲足樹矣。

自春三月迄夏五月，余與和李兩君逕寓印刷廠中，晝夜督印，進度頗速，蓋原定出版期在本年一月，當時付稿無多，嗣乃隨核隨印，而李君病矣，促其遄歸，和君獨任校讐。東路戰局忽緊張，常有空警，廠在東城根，又稍南移，用是排印工作頗受影響。日者東都告急，風鶴頻驚，斯志竟能於板蕩中成書，亦大足資紀念。余將度隴，亟述其顛末如此。

中華民國三十三年五月，黎錦熙序於西京崇禮路泰華印刷廠。

同官縣志序

邑志修自清乾隆乙酉邑令豫章袁文觀，迄光緒末，其間失修者垂一百四十餘年矣。宣統初，省垣續修通志，札縣採訪寄稿；邑宿學余君葆初承充斯役，記載頗爲詳贍。惜經辛亥改革，強半散佚。民國己巳冬，國民革命軍第四集團軍馮總司令玉祥飭縣採編新志材料。時樂陵白公如琳權縣篆，命不佞司採編之役。事竣後，繼復有續修縣志之舉，未及半數中輟。歲甲戌，合肥劉公學海長縣事，以縣志關乎地方之掌故與一邑之文獻，銳意續修，聘李君楊山司採編。經一年有六月之努力，跋山涉水，搜巖剔谷，其詳盡精覈，大綱子目，朗若列眉，較袁志有過之無不及。未及付梓，適丁七七之役擱置。歲壬午，第二區行政督察專署余專員正東有編纂三區方志之舉，飭縣荐數人採訪，時掌縣篆者爲龍門姚公文蔚，以寇君湘陽，李君楊山，楊君華亭，姬君志周，王君蘊章及不佞六人列荐，由余專員特聘充役。詎姬君就中部縣民政科長職，寇王二君亦因別事羈身，弗克參預秉筆；且篇目未頒，無從着手。嗣九月十一日奉到專署所頒「編修方志預擬篇目」「採訪須知」「工作準則」暨各項「調查表」五十六種，即在縣政府召開工作進行會議，復增聘縣黨部、縣政府各科室各指導員督學、各鄉

鎮長暨士紳數人採訪，以期速成厥事。隨於二十八日開始編修，假煤礦公會爲會址，其負編纂重要工作者爲李楊二君。不佞年近周甲，粗俚無文，竊不自揆，亦從事二君之後，濫竽充數。復延李君景民司繪事。惟是志乘一書，一邑之掌故，一代之文獻，地方之因革，政治之損益所資借鏡者也。非旁採博稽，難得精確之記載。第滄桑遞變，摺紳家藏書無多；兵燹頻遭，縣政府舊檔難悉。雖以李君之再度劉郎，駕輕就熟；楊君之閱通淹貫，博學多聞，幾感無從着手之苦。本編篇目，一依專署所頒，其爲本縣所無或考稽難悉者，寧闕無濫，免貽臆造之譏。凡爲篇三十，爲目一百有五，爲總分圖二十有二，總計五十餘萬言。惟李楊二君及不佞均係兼職，弗克專心從事，爲時四閱月，未能完成，竊自愧慙；又因限於經濟，既作復輟。至去年八月田縣長涵三再權縣篆，專署一再督促，乃再從事斯役。特學殖荒落，未能精詳考訂。復由余專員聘湘潭黎君劭西（錦熙）司總纂，其間闕者補之，訛者正之，精心考訂，總歸至當，而於方言謠諺中之「聲母」「韻母」及「同音字譜」獨具心得，不厭求詳。不佞與李君復從事校役，與黎君相處者三閱月，朝夕談論，開益良多。茲全編已經印竣，爰敘其事之巔末而爲之記。時中華民國三十三年壬申五月邑人和文瑄序於西京寓室。

同官縣志序

昔孔子論夏禮殷禮。以杞宋之無徵，致慨於文獻之不足。是文獻繫乎一代之制度風化，綦深且重。古者列國莫不有史，而方志之掌，見於周禮。秦漢以降，郡縣斯志，風土人事，傳述靡闕。吾同邑志，創始不可考，據明寇永修氏志序，始於嘉靖之楊曹州。嗣後迄清乾隆乙酉，已經四次纂修。惜板本無存。宣統至民國甲戌，又復三度採編。民國三十一年季冬，奉令重修，邑人名宿，多參與焉。濟濟一堂，寒暑研討，貫精力，廣採訪。其屬於政治經濟文化地理人物輦輦諸大端，無不搜羅詳盡。舊志各門，既多補益，新增諸目，尤切時要。縣長田公涵三，重宰吾邑，對斯志之纂修，尤多擘劃與策導。自春徂冬，歷時週歲、歲事付印，蔚成大觀。上可備黨國政治之採擇，下可供觀風士夫之參攷。嘉言懿行，矜式後來，善者勸而惡者懲，裨益良非淺尠。抑尤有進者，吾邑偏處北鄙，地瘠民貧，質勝於文，教化遲落。至礦產之掘採，陶瓷之改良，荒山僻壤之墾植，文化經濟之建設，尤屬急不容緩。觀風賢令，邑紳碩彥，參酌斯志，因時措施，化貧瘠爲庶富，振鄙野於文明，庶斯志與事功將永垂於不朽。蘊章忝列採訪，贅數言弁諸簡端云。邑後學王蘊章序於同官財務委員會。

纂修姓名

主修：陝西省第三區行政督察專員兼保安司令 大冶余正東

同 官 縣 長 渭南田在養 涵三

總纂：教育部部聘教授國立西北師範學院教務主任 湘潭黎錦熙 劭西

採編：同官縣煤鑛業同業公會主席陝西師範學堂肄業清增生 邑人和文瑄

同官縣中山鎮鎮長陝西省立第一師範學校肄業 邑人李蔚文 楊山

同官縣陳爐鎮中山中心學校校長陝西省立第三師範學校畢業 邑人楊春榮 華亭

繪圖：陝 西 省 地 政 人 員 訓 練 班 畢 業 邑人李景民

採訪主任：同官縣政府第一科科長陝西省立第一師範學校畢業 邑人翟增烈 新三

採訪：同官縣黨部書記長陝西中山學院畢業 三原孫志剛

同 官 縣 司 法 承 審 咸陽郭延齡 益軒

同官縣財務委員會主任委員陝西省立第一中學畢業 邑人王少文 蘊章

同官縣政府秘書陝西省立第一師範學校畢業 邑人姬命新 志周